


## Rogē gyvenēms

Rogē daigs eš žemēs kelas,  
 nu galvuos sau krumslī veit.  
 Porva nu akiun nuvalēs.  
 Kēik tik gal i aukšti kert.  
 Žēima anon snēigs troškēna,  
 leds užgolēs baisee spaudē.  
 Spēigaa pašalius spruogdēna,  
 tvuorgalee puoškiejē graudee.  
 Rudēni kēitējee groudaa  
 viel kaap reek gyventē neleeda.  
 Pu šaknun i žemē jouda  
 kala kaltus kēita leda.  
 Vuo n gys vis tēik išstypa  
 er gražee gražee išplaukē.  
 Uns, akis platee pravierēs,  
 ne tuokiun daiktun dar laukē.  
 Viel važioutē iš rogeinu,  
 viel i jouda žemē krēstē.  
 Ei, ož vēina vasaras dēina  
 gal ne vēina žēima kēnstē.

## Trobalē pri opēs

Vies trobalēs čiupryna pašiaušē.  
 Sens eso, kaap latožis, nudrebēs par kota.  
 Metu peilees lēg krauje nugrondē pakauši  
 Už skauolas ēr už donas pasenosē plota.  
 Jauno būdams aš pats ton trobalē pri opēs  
 Sokērtau iš velnionēšku ronstu.  
 Po dērvonus aš akminis rausčiau kaap ropēs.  
 Šees laikaas tokē vēina akmēns dešimtēs išsēgonsto.  
 Bova galēs kaap vondēns er sekēs ba vēina.  
 Merga vešlē labaa nuveiziejau par patē.  
 Er nušvēta trobalēs nurūkossēs sēinas,  
 Kad ana pērma karta če kojē pastatē.  
 Biega opē. Čiorlena prū gala trobalēs.  
 Leedos vasaras, žēimas, pavasaree vešlūs.  
 Auga mēžiū auksiniū dērvalēs,  
 Auga sūnūs, dukterys rūga kaap tešlas.  
 Vo kad paauga -- stiprybēs nabova kor dietē.  
 Vēsē akmenis rautē noriejē, draskytē pliešēma.  
 Vēsē troba er patē, kaap ouga ēšsērposē, geidē torietē,  
 Svērma pēlna grūdū, vasarojaus prikrauja kļojēma.  
 Bet dērvonaa jau bova vēsē išdraskytē,  
 Er kaap ropēs išraustytē akminis bova.  
 Er neblēka žaliūkams sūnams, kas trobalie pri opēs darytē,  
 Er sapnaa aple dedēlē laimē, kaap dūmaa pražova.  
 Vēins pražēlusi tieva trobalie palēkēs,  
 Išsēplovē i pašali žemēs par jūrēs;  
 Kēts, kaap rudēni avēns, blaškytēis užnēkēs,  
 Vydams laimē apgaulē, i miesta iškūrē.  
 Vēins lēkau če, pasenēs, sulinkēs.  
 Riemou degēn ismegusi šona.  
 Vo laukū, tēik laukū nagyventu aplinkou...  
 Vēsa žemē kaimyna -- dērvonaa.

## ANGLICKIS STASYS



## Šermukšniu ougu raidē

Ont kalna vyraa  
 žombees arē lauka.  
 Pakalnie ontēs  
 par Atlanta plaukē.  
 Ont kalna gondraa  
 leipoo lēzda kruovē.  
 Pakalnie mergēs atneštus  
 anun vystykļus pluovē.  
 Ont kalna epošēs  
 žalioms skareliems tekšnuojē.  
 Pakalnie laumēs audeklus  
 ont žemēs kļuojē.  
 Ont kalna aš  
 regiejau auksa žvaigždē.  
 Pakalnie iš šermukšniu ougu  
 diejau pērma raidē.

ŠEDUIKĒ ALVYDA puortēgrapējē